

Gvangjsih Minzcuz Bau

广西民族报 ganhhau: CN45-0036 B.2020 Nd.10 Ng.14 liggaueq gengcej nienz ndwenbet ngeihbet

Baihguenjbanh: Gvangjsih
Bouxcuengh Swcigih Minz-
cuz Cunghgyau Swvu Veij-
yenzvei
Biengauj okbanj: Gvangjsih
Minzcuz Bause
Geizsoq: Gungh daih 3444 geiz
Geiz neix 8 banj

Gih Raeuz "Song Ciet" Ginghci Lai Hoengh Raeuh

10 nyied 9 hauh, gicej cam Swcigih Sanghvu Dingh ndaej rox, duenh "song ciet" (ciet betcibngux caeuq gozging) gak dieg banh baenz-roix hozdung cezmuz lai cungj lai yiengh, vunzlai sim' angq ndaej leih, coinyoengx siuyungh lai bae, langh rengz hung coinyoengx vunzlai siuyungh. Ciuq gyoepsuenq, 10 nyied 1 hauh daengz 8 hauh, doengh giyez gailingz caeuq guhgwn daeuz ndaej

yawj riengzlaeng de bingzyaenz ngoenz gai bae beij bi' gvaq caemq duenh seizgan gyahwnj lai 5.5%.

Yienhciegz gaicawx caeuq gwnz vangj gaicawx doxgap dazyinx yiengh siuyungh moq. Gak si ranghdieng gaicawx daeuz vunzhek beij mwh gaxgonq duen ciet neix gyalai daihgaiq 3 boix. Duenh song aenciet neix gai bae gij doxgaiq vunzlai gvaqngoenz aeuyungh de lumj gijgwn, yinjliux, ien

laeuj daengj faenbied gyalai 8%、4.6%、2.2%; gai bae gij doenghyiengh ndangdaenj lumj buhvaq, haiz mauh, doenghyiengh baengz daengj faenbied gyalai 25.5%、15.7%、14.6%; gij doenghyiengh ci, dunghsin daengj faenbied gyalai 2.9%、5%.

Baez "song ciet" neix lumj "aenciet ndwencieng nguh daengz" nei, vunzlai banh gak cungj ngaizdonq couxbawx haqlwg, ngaizdonq vunz ndaw ranz

doxcomz, ngaizdonq baengzyoux doxcomz daengj, neix dwg yiengh gwnndoet daeuz, hawj hangznieb guhgijgwn hwnghoengh. Ciuq gij soq yawj riengzlaeng de ndaej rox, caeuq bi-gvaq caemh duenh doxbeij gijsoq gaicawx gvendaengz giyez daeuz guhgijgwn de dingzlai dauqfuk daengz 90% doxhwnj, gijsoq gyalai de beij ndwen gonq lai hwnj 15% baedauq.

(Cauh Hungzmeiz)



Sanhgyangh: Huznanz Gvangjsih Doxgap Guh Yezyej Langhbaij Funcingz Duncuz

10 nyied 2 hauh, Sanhgyangh Duncuz Swciyen Linzhil Cin Cwngzyangz Cunh Mbanjdacai banh aen hozdung daih' it gaiq Huznanz Gvangjsih doxgap guh yezyej, Huznanz Swngj Dughdau Duncuz Swciyen caeuq Gvangjsih Sanhgyangh gungh miz baenz cien boux beixnuengx Duncuz doxcomz guhdoi, doxdax boq aenvenz, yienj cezmuz, guh ngaizdonq bak ranz daengj, cezmuz lai cungj lai yiengh, vunzlai doengzcae angqvauvau, haenhdei aencingz aendangi, langhbaij yienghsienq mbanj caeuq vunz Duncuz gyaunde, neix yinx haujlai hekyouz daeuj yawj daeuj riengz guh hozdung.

(Gungh Bujganh)

Hozciz Gij Hozdung Minzsuz Youq Ndaw Lijyouz Hwnghoengh

Lungzsae angqhoh betcibngux, bouxsae dajcaeq, rom giuz, seizcou soundaej lai, doenghyiengh Vaizyenj gag miz, heiqcaijdiu, boux Liuz-sanhcej iqet, daenj gizbauz hawj vunzlai yawj daengj 8 aendoih cunzbyaij neix doxcae doxriengz baenaj, bae daengz gizlawz, boux-hekyouz cungj gaem soujgih hwnj-daeuj ingjsiengq, nauhyied baenzmaz bae, gijneix dwg aen ciengzmienh "betcibngux baiq ronghndwen" ndeu—gicej youq geij ngoenz ciet neix youq Yizcouh Gih Vaizyenj Cin caen da raen. "Ngoenz guh hozdung betcibngux baiq ronghndwen de,

gyawj 2 fanh vunz doxcae haeuj ndaw Vaizyenj Cin daeuj." Vaizyenj Cin dangvej suhgi Lij Cwsungh naeuz.

Youq Lozcwngz, diuq fouxlunz-nyangj Mulaujcu, daenj ndangdaenj Mulaujcu caeuq byaij hawj vunzlai yawj, bouxsai mehmbwk doiqfwen, diuq fouxfaexsax, aemq bawxmoq daengj doenghij hozdung mizyinx neix aen dam aen guh, dazyinx haujlai hekyouz riengz guh.

"Daengz Dughlanz, aeu yawj Veiz Bazginz Gijnengvanj mbat ndeu." 10 nyied 8 hauh, yaek dauqbae le, boux hekyouz Lij Daicungh daj

Gvangjidungh Cuhhaij Si daeuj de dangq Dughlanz Gwzmingz Lezsw Lingzyenz guh giz ceiq sat aeu yawj de.

"Dou youq gaxgonq duenh ciet neix doi roek diuzroen lijyouz ndei, hozdung minzsuz angq gvaq ciet, gwzming lijyouz, gijneix youq duenh song ciet neix hwnghoengh lailai." Hozciz Si Vwnzgvangjdijligiz fugizcangj Moz Ningz lwnh, "daengx si duenh ciet gozging neix gungh ciepekyouz 175.59 fanh vunzbaez, lijyouz siuyungh 7.01 ik maenz."

(Liu Ginglingz)

SIUSIK DINJ

● Daengz ndwen neix ndawco, Nanzdanh guh sat hong gajguh 781 aen ranzyiemj, mauhgvaq gijsoq yinvu bineix youz swcigih, si dingh hawj de, 3100 boux vunz lajmbanj youq ranz mbouj onj de ndaej youq ranzonj lo.

(Moz Cujnwngz)

● Daj bineix doxdaeuj, Hinghyez Yen youq gyawj ranz ginzcung hwnqguh ranzcangj banggunz, hawj boux ranzgungzhoj ndaej youq gyawj ranz guhhong, ndaej doq dozciengz doq ganq ranz. Suenq daengz dangq-naj, aen yienh neix gungh miz 165 aen ranzcangj, hawj 6791 boux miz hong guh, hawj 1271 boux ranzgungzhoj ndaej hong guh.

(Hoz Saufung)

● Geij ngoenz gonq, Duh-anh Yauzcuz Swciyen 11527 boux ganbu banggunz ciemdingh mbawsaw laemxsim hingzdingh ciengz ciengq gunggeng duet-gungz, Duh' anh youq 90 ngoenz ceiq laeng neix langh rengz liuxcae, ok banhfap ceiq haenq guh banggunz, heuh gyoengq ganbu banggunz aeu ciuq gij dajsuenq baihgwnz hengz daengz daej bae, gamj dawzrap, gag rox haenqrengz, naij hoj naij haemz, okrengz bonjfaenh coengh hoenx hingz ciengz ciengq neix.

(Veiz Cinghrui)

● Liujcouh Si Vwnzva Gvangiden Caeuq Lijyouz Giz 10 nyied 8 hauh lajbyonghngoenz ok siusik, ginggvaq daihgaiq gyoepsuenq, bineix duenh ciet gozging, betcibngux, Liujcouh Si gungh ciepekyouz 399.18 fanh vunzbaez; daengx si lijyouz siuyungh 27.08 ik maenz.

(Yiz Sienghceenz)